

Vierge Marie de gli Angeli, & qu'il ne regrette pas d'y retourner deux fois, veu que la chose merite bien vne double remarque, & l'aduertis de plus (Je l'auoy cy dessus oublié) quil y a aultant de portes, & chemins soubs icelles, comme soubs les Antonianes, ou iay esté long temps aussy.

Or ayant bien veu, & tout remarquè, qu'il prenne le chemin, qui va a s. Marie Maieur, au deffoubs de laquelle dans la vallee il trouuerra l'Eglise de s. Potentiene ou estoient anciennement les estuues de Nouatius.

Vn peu au dessus, au lieu, ou est a present le monastere de s. Laurens in Palisperna estoient les estuues Olimpies, avec grand edifices par ce qu'elles arriuoient de l'vn a l'aultre costè. Comme l'on peut veoir de s. Marie Maieur. Souuent les pauures Aegyptiens y vont loger.

Du temple d'Isis, & aultres choses.

Av mesme endroiect ou est a present s. Marie Maieur, estoit anciennement le temple d'Isis, que les Romains estimoient grandement.

Et là, ou est or la chapelle de s. Luc auprès de l'Eglise de s. Marie Maieur iusques en bas estoit le bois sacrè a la grande Dæsse Iunon, qui est auourd'huy incorporè la vigne du Pape Sixte.

Vn peu au dessus dans la vigne de s. Anthoine, estoit le riche, & admirable temple de Diane, ou les Romains faisoient leurs sacrifices avec grande opulence, & richesses.

De l'aultre costè, ou est a present l'Eglise de s. Martin, estoit le temple de Mars, que tous les Capitaines, & Soldatz adoroient.

Des sept Sales, du Colisee, & aultres Antiquitez.

Ayant après passè ladiète Eglise, il trouuerra vne rue, qui le menera droiect a s. Pierre in Vincula, mais la laissant, qu'il prenne la premiere ruelle qu'il trouuerra, & en icelle il verra vne chose admirable que l'Empereur Titus fit pour son Pontife.

Cela estant veu qu'il retourne de hors, & passe en bas par le premier chemin entre les vignes, qui le conduira a s. Clement monastere de Religieux, puis arriuant a l'admirable, & Antique Theatre de Vespasian dict le Colisee, il verra vne machine, qui a la verité n'a point de semblable au monde, bié que celuy de Verone soit beau, toutesfois cestuy cy le surpasse en fabrique, & grandeur